

ꞑapiya Sën Paulus Kevu Muginsën Vu Kerisi- yi-alam Vu Timoti

1 ¹ Sa Paulus sën Yesu Kerisi yi sinarë sa. Anutu sën ꞑo hil yom vu yi lo luho Kerisi Yesu sën hil navo kwad in lo, yö denër bē sa ġevonġ huk sagi. ² Lob sa ꞑevu ꞑapiya sënë yök vu hong Timoti sën sa nehalē hong bē sa naluġ anon hong in ayom neya timu vu Kerisi lo. Hil Amad Anutu luho hil Mehöböp Kerisi Yesu degevonġ semusemu vu hong los kwaj gevonġin hong, gedegevonġ bayom ġep revuh.

Hil Dahun Ġaġek Kuungsën Na

³ Wirek sa hevonġin bē sena Masedonia jaġ, lob senër vu hong, rēk sa bē nanër gökin nah vu hong nabē: Ġemedo Epesus in ġenanërin alam vahi saga nabē su desarömin ġaġek kuungsën doġ na medetahu alam doġ. ⁴ Log ġenanër vu sir nabē degevuu ꞑeriing los ġaġek sën denetateġin degwaj lo na, in ġaġek nebē sagi nevonġ mekwaj kwaj. Gaġ su nelok vu sir bayoj neya timu vu Anutu rē. ⁵ Sa hevonġ horek sënë yök vu hong raġ degwa timu sënë: Sa hevonġin bē desepa doġ bayoj niröp jaġ gekwaj verök jaġ bayoj na timu vu Yesu, lob mēm demedo los ahēj geving sir. ⁶ Yönon, in alam vahi devuu aggata niröp sënë ya, geya deneketul loġ in ġaġek meris medenesap sir in jeggin jeggin. ⁷ Alam sënë denekuung bē detu alam horek degwa. Rēk su deneraġ yö hir ġaġek sën denevengwēng raġ lo degwa ni rē, log sir duġin ġaġek sënë degwa ving.

⁸ Nabē hil ġalē Anutu yi horek niröp nabē negġep in bē tato aggata niröp vu hil, og hil rēk ajaġ ni nabē nġaa nivesa. ⁹ Yönon, hil araġ ni bē horek og su yam in bē nanërin alam sën nijröp raġ lo rē, gaġ yam in bē nanërin alam sën denekeyēh horek lo, los alam sën denevonġ nġaa jeggin jeggin los nengaj dahis lo. Geyam in bē nanërin alam sën deneruu demij vu Anutu lo, los alam nij paya, gesir sën denevasap Anutu yi nġaa vabuung lo, gesir sën denesepa loġ nġaa dob yi mu lo; geyam in bē nanërin alam sën denesis amaj los ataj medenediik lo, los alam sën

denesis mehönon vahi medenediik lo ving. ¹⁰Geyam in bë nanërin maluh los avëh sën denevonğ baggëb lo los denevonğ paya vu maluh ngwë lo. Geyam in bë nanërin alam sën deneggodek alam in bë degeko monë jak sir lo, los alam gagek tetuhin sën, galam sën denelah gagek vun lo. Yönon, horek yam in bë nanërin ngaa nebë sënë los ngaa nipaya vahi pin sën nevonğ paya vu gagek anon lo. ¹¹Gagek anon sënë neggëp loğ Bengö Nivesa sën Anutu vo vu sa in bë sa nanër rangah lo, log Bengö Nivesa sagi netatekin Anutu arë böp los niwëek vu hil bë semusën ala yi.

Paulus Ahë Nivesa Vu Anutu In Kwa Pesivin Yi

¹²Hil Mehöböp Kerisi Yesu vo niwëek vu sa, gekwa nevo sa bë seyoh vu bë sa gevonğ yi huk, lob vonğ huk sënë loğ ya sa nemağ, lom sa ahëg nivesa vu yi. ¹³Yönon, wirek og senër pelë rak yi, log sa nehevonğ begö vu yi alam rot gesa nehaço sa rak vu yi pangësën. Sa nehevonğ nebë saga in sa su rak degwa ni rë, gesa su hevonğ ving yi rë, rëk ma gekwa pesivin sa. ¹⁴Lob Mehöböp vonğ semusemu ngahisekë rot vu sa, bemëm sayoğ neya timu vu Yesu Kerisi, besahëg ving yi pangësën. ¹⁵Gagek sënëk yönon rot, beyoh vu bë alam pin degengo medegevonğ geving nabë Kerisi Yesu luğ yam dob in bë geço hil alam nid paya nom vu yi. Lob sa mehö niğ paya verök yi rot kesuu alam nij paya vahi pin. ¹⁶Rëk mu Kerisi Yesu kwa vonğin sa muğin betato rangah rak sa bë nejom yi ahon rot. Lob alam vahi pin sën rëk ayoj na timu vu yi lo degelë jak sa bedejak ni nabë rëk kwa gevonğin sir nabë saga geving, bedemedo malaj-tumsën degwata. ¹⁷Om hil gaço mehö-los-bengö sën nedo degwata los degwata lo arë jak. Arë böpata los niwëek gëp rangah beyö gëp degwata los degwata, in mehö sënë og su nediik rë, gehil su ayoh vu bë galë yi rë, log yik yi perurek timu saga sën Anutu soğek.

Timoti Bare Niwëek Begedu Alam Sën Denesis Begö Vu Anutu Lo

¹⁸Naluğ Timoti-e! Sebo horek sënë vu hong nabë: Kwam bo gagek sën alam-denenër-gagek-rangahsën denër rak hong wirek lo. Gebasu gagek sagi doğ na ayom, loğ mëm pasang gwevonğ begö megebare niwëek nabë mehö-begö-yi nivesa ti. ¹⁹Lob gwevonğ geving niwëek megebare, gegemedo los ayom niröp. In alam vahi su denesepa loğ ngaa nivesa in bë ayoj niröp jak rë, om sën deneyoh paya medevasap sir nebë sën yağ ya mesis yi rak saap. ²⁰Yik Humenaius luho Aleksander devonğ nebë sënë, lob sa hevonğ luho loğ yah Satan nema in bë luho degeko vanë medejak ni, in luho su denanër pelësën jak Anutu arë nah gökin.

Hil Najom Jak Nabë Sënë

2 ¹Sa bë nanër niwëek vu hong nabë ham gwevonğ ngaa sënë natu muğinsën: Ham najom jak in alam pin. Ham kwetağ vu Anutu nabë

doḵ vu sir bebo niwëëk vu sir medebare, log ham najom jaḵ los kwamin vesa vu yi in sir. ²Log su kwam birek in alam-los-bengöj galam pin sën denetu ala medeneḡin hil lo. Gaḵ ḡenajom jaḵ in sir noh vu buk in mëm hil sepa doḵ Anutu meḡaḵo arë jaḵ niröp, log hil medo nivesa ḡengaa maggin su dahun hil. ³Jomraḵsën nabë sënë og mëm yoh vu, bAnutu sën ḵo hil yom lo rëḵ kwa vesa in. ⁴Neḵo hil yom vu yi, genevonḡ in bë ḡeḵo alam pin nom geving, bemëm dejaḵ ḡaḡek anon degwa ni. ⁵In hil arak ni bë Anutu yö timu nedo, log Mehö mamer-yi timu nare loḵ Anutu los mehönon vuheng atov. Yiḵ yi Kerisi Yesu, geyi mehönon. ⁶Lob töḵ yam ranḡah loḵ yi buk niröp sën Anutu yö ggooin rak menër lo, bediik loḵ yah alam pin bej in baḡo sir nom. ⁷Log Anutu ggooin sa rak bë sa natu sinarë beḡevonḡ yi huk menanër yi ḡaḡek sënë ranḡah. Sagi og sa su nehekuung rak rë, gaḵ sa nanër yönon. Geggooin sa rak, menevonḡ sa ya vu alam-yu-ngwë in bë sa tateḵin ḡaḡek vu sir bayoj na timu vu yi medejaḵ ḡaḡek anon ni. ⁸Nebë sënë, om sa hevongin bë alam denajom jaḵ noh vu nyëḡ pin. Rëḵ mu degevuḡ ḡaḡek petupeksën los ahë sengënsën na gedepesu nemaj in nḡaa nipaya loḵ mëm debarah nemaj jaḵ medenajom jaḵ na vu Anutu.

Ḡaḡek Rak Avëh

⁹Log sa hevongin ving bë: Avëh dedahun sir bedejöp röpröp lu nḡaa nivesa sën yiḵ yoh vu bë avëh dejöp lo. Gaḵ su degeḵo sir jaḵ medebii yuj los debunëḵ vu navij jaḵ ḵumḵum goor lu vunëksën malanḡeri aggagga, los röpröp sën yi monë böpata lo. ¹⁰Gaḵ degevonḡ huk nivesa aggagga noh vu sën Anutu yi hur avëh lo degevonḡ lo, og mëm sënë natu hir vunëksën anon rot. ¹¹Avëh dedahun sir bayej nama gedegenḡo ḡaḡek medejaḵ ni nivesa. ¹²Sa hevongin bë avëh ti su natu tatovaha ma ggev vu maluh rë, gaḵ sir avëh og avij gemir gemedo denapöo jaḵ ḡaḡek mu. ¹³In degwa nebë Anutu semu Adam muḡin loḵ mëm semu Eva tamusën. ¹⁴Lob Adam su bë nenga vu ḡaḡek kuungsën rë, gaḵ avëh mu yö keyëh mebë nenga vu ḡaḡek. ¹⁵Rëḵ mu avëh hir huk bë degeḵo naluj, om yiḵ degevonḡ nabë saga, gayoj na timu vu Yesu geving bahëj nivesa vu mehönon medesepa doḵ aggata niröp los degeḡin sir nivesa, og Anutu rëḵ ḡeḵo sir nah vu yi.

Ḡaḡek Rak Ggev Sën Deneḡin Kerisi-yi-alam Lo

3 ¹Ḡaḡek sënë og yönon: Bë mehöti gevonḡin nabë natu ggev beḡeḡin Kerisi-yi-alam, og sënëḵ gevonḡ in huk nivesa ti. ²Nebë sënë, om ggev geḡin yi nivesa in nḡaa nipaya su ḡep vu yi. Yiḵ ḡeḵo avëh timu natu venë. Su gevonḡ nḡaa jeggin jeggin, gaḵ yiḵ sepa doḵ kwa nivesa mu megevonḡ huk niröp pin, geḡeḡin alam vatëveḵ nivesa, getateḵin Anutu yi ḡaḡek nivesa megero. ³Ggev nebë sënë og su nanum pangsën mekeyevin, log su ahë sengën

jaḵ pevis, gaḵ nahubin alam gesu gevonḡ beḡö jeggin jeggin, gesu gëp natumin monë pangsën. ⁴Geyö gëgin venë lo nalu lo nivesa begevong benalu lo nengaj yes vu aye medegurek babu. ⁵In mehö sën su neḡin venë lo nalu lo nivesa rë lo, og su yoh vu bë rëḵ natu Anutu-yi-alam lo hir ggev megeḡin sir nivesa rë. ⁶Log ham su gwevong bemehö mewis ti sën nahën neggërin yi yom vu Kerisi lo natu ggev. In rëḵ geḡo yi jaḵ jaḵ lob rëḵ bës benatōḵ vu nyëvewen nabë Satan. ⁷Om nabë hil ḡetunḡ mehöti natu ggev, og alam dahis la denanër geving rë nabë yi mehö nivesa, og mëm yoh vu bë natu ggev. Gaḵ nabë hil su ḡanḡo rë, og maḵ rëḵ ḡaḡek nipaya natōḵ ranḡah jaḵ yi, lob doḵ Satan yi ḡegweeng.

Ḡaḡek Raḵ Kerisi-yi-alam Hir Hur

⁸Log gwetunḡ alam sën kwaj nivesa lo denatu Kerisi-yi-alam hir hur geving nabë saga. Alam sën su denevonḡ kwaj luu rë lo, galam sën su denenum wain rot medenekeyevin rë lo, galam sën su ggëp denetumin monë luu nḡaa rë lo. ⁹Gaḵ mëm sir sën ayoj yö neggëp niröp gedeneraḵ ḡaḡek-anon-vongvingsën-yi ni venuh lo og mëm. ¹⁰Ham seggi sir namugin rë, loḵ nabë ḡaḡek ti su neggëp vu sir rë, og mëm denatu Kerisi-yi-alam hir hur. ¹¹Log ham gwetunḡ avëh sën kwaj nivesa lo geving nabë saga. Avëh sën su denenër ḡaḡek nipaya yah nenga raḵ mehö ngwë rë lo, gesu denevonḡ nḡaa jeggin jeggin rë lo, gaḵ denenër ḡaḡek niröp bedenevonḡ yoh vu lo.

¹²Lob Kerisi-yi-alam hir hur lo, og degeḡo avëh ti ti natu venëj, lob degeḡin venëj los naluj nivesa. ¹³Lob sir sën detu Kerisi-yi-alam hir hur bedenevonḡ huk nivesa lo, og rëḵ bengöj nivesa, lob deyoh vu bë rëḵ degevong Kerisi Yesu yi huk nivesa los niwëëk.

Anutu Yi Aggata Degwa

¹⁴Yönon, gwëbeng sa neḡevu ḡapiya sënë yök vu hong, rëḵ mu sa bë nöḵ vu hong pevis. ¹⁵Rëḵ mu nabë sa su nöḵ pevis rë, og gwelë ḡaḡek sënë megejaḵ ni nabë Anutu-yi-alam sën detu Mehöböp Mala-tumsën-degwa yi alam lo, og rëḵ degevong nabë sënë in deneḡin ḡaḡek anon medeneḡadu. ¹⁶Yönon, ḡaḡek sën duu hil yah vetii Anutu lo, og ḡaḡek böpata rot bedegwa neggëp. Ḡaḡek sënë nebë:

Tu mehönon raḵ betōḵ yam ranḡah,

log Anon Vabuung tateḡin yi degwa bë yi mehö yohvu.

Angër delë yi,

log bengö yoh vu alam dahis.

Mehönon ayoj neya timu vu yi,

lob Anutu ḡo yi raḵ yah vavunë beḡo arë raḵ.

Ḡaḡek Raḵ Alam Tetuhinsën

4 ¹Anon Vabuung nër ranḡah bë dus jaḵ Buk-tamusën og alam vahi rëḵ degevu ḡaḡek sën hil nehevong ving lo na, getum rëḵ degebë

nengaj vu memö kuungsën ayej bedesepa doḵ Satan yi angër nipaya lo hir ḡaḡek. ²Nḡaa sënë rëḵ nam vu alam kwaj luu sën denenër ḡaḡek kuungsën lo. Alam sënë rëḵ ayoj bev rasap nabë aën niḵerus, besu deyoh vu bë deseggi nḡaa nipaya los niröp medejaḵ ni rë. ³Log alam saga rëḵ denanërin nabë maluh los avëh su degeḵo sir, gaḵ demedo bu, log rëḵ denanërin nos los reggu vahi nabë hil su aḡa. Rëḵ mu su yoh vu rë, gaḵ Anutu yö tung nḡaa pin sënë in bë hil mehönon sën hil ayod neya timu vu yi menaraḵ yi ḡaḡek anon ni lo, hil aḡa gahëd nivesa vu Anutu. ⁴In nḡaa pin sën Anutu tung lo og nivesa, om hil su ajuuk, gaḵ hil nanër ahëd nivesa vu Anutu gehil aḡa. ⁵Ëë, yönon, Anutu yi ḡaḡek los hil jomraḵsën saga nevonḡ benivesa neraḵ.

Timoti Tu Kerisi Yi Hur Nivesa

⁶Log nabë ḡenanër ḡaḡek pin saga vu hil arid lo sën Kerisi-yi-alam lo, og mëm saga rëḵ tato nabë ḡetu Yesu Kerisi yi hur nivesa ti geḡenesepa loḵ ḡaḡek niröp meḡeneraḵ ḡaḡek sën hil nehevongḡ ving lo degwa ni. ⁷Rëḵ mu nim dëlin ḵeriing nipaya los avëh atov hir ḡaḡek turinsën meris meris, gaḵ mëm ḡetahu hongḡ doḵ Anutu yi aggata nivesa. ⁸Yönon, hil netahu hil loḵ nḡaa navid yi in bë hil navid genḡoin, rëḵ mu yiḵ neloḵ vu hil paya teka mu. Gaḵ mu nabë hil tahu hil doḵ Anutu yi aggata, og yoh vu bë rëḵ doḵ vu hil pangsën rot. Sagi og yoh vu bë doḵ vu hil vu buk sën hil nado gwëbeng agi, gehil rëḵ medo malad-tumsën vu tamusën geving.

⁹ḡaḡek sënëḵ yönon rot, beyoh vu bë alam pin degenḡo medegevonḡ geving. ¹⁰Om sën hil nehevongḡ huk böp los nid ḵerus ḵerus. Hil ahurek Anutu sën mala-tumsën degwa lo babu in nevonḡin bë geḵo alam pin nom vu yi, lob ḵo hil sën hil ayod neya timu vu yi lo yom yönon. ¹¹Om ḡenanër ḡaḡek sënë vu sir meḡetahu sir doḵ in desepa doḵ. ¹²Nabë alam degelë hongḡ nabë ḡenahën maḡëm, bekwaj bo nabë hongḡ mehö meris, og su gwevuuk huk rë. Gaḵ ḡemedo meḡetato aggata vu Kerisi-yi-alam pin jaḵ nḡaa pin sën ḡenanër los gwevonḡ lo. ḡetato vu sir nabë ahëm neving sir yönon gayom neya timu vu Yesu, geḡenesepa loḵ nḡaa niröp mu. ¹³Su nim tebö, gaḵ nim wëëḵ meḡenatevin Anutu yi ḡaḡek vu alam, beḡenanër Bengö Nivesa rangah meḡetateḵin vu sir rot bena berup doḵ buk sën senök berup vu hongḡ lo. ¹⁴Su nim yes yes in Anutu yi semusën sën vo vu hongḡ lo, in alam ggev debë nemaj raḵ hongḡ wirek. Log alam-denenër-ḡaḡek-rangahsën denër bë semusën sënë rëḵ natöḵ vu hongḡ. ¹⁵Om gweḡin huk sagi nivesa noh vu buk beḡemedo doḵ rot, lob mëm alam pin rëḵ degelë nabë hongḡ huk neya nivesa. ¹⁶Gweḡin hongḡ los huk sën genevonḡ agi bekwam bo ḡaḡek sën ḡetahu sir doḵ lo nivesa. Gwevonḡ huk sënë niwëëḵ rot, og mëm rëḵ gweḵo hongḡ nom vu Anutu, begweḵo alam sën degenḡo hongḡ ḡaḡek lo nom geving.

Timoti Geli Alam Doḱ Aggata Niröp

5 ¹Su ḡebo ḡaḡek jaḱ alam böp, ḡaḱ ḡwelë sir nabë amam lo benahub ḡebo horek vu sir. Log ḡwelë alam maḡëm nabë arim lo sir. ²Log avëh böp og ḡwelë sir nabë atam lo, log ḡwelë avëh avö nabë avëhnöm lo ḡengaa nipaya nöḱ ḡëp.

ḡaḡek Raḱ Avëh Alov

³Log ḡweḡin avëh alov lo sën regḡaj diiḱ ḡeḡej alam ma lo nivesa. ⁴ḡaḱ avëh alov sën nalu lo ma bu lo denedo lo, og mëm deḡaḱ ni nivesa nabë hir huk negḡëp bë dedoḱ vu amaj los ataj ḡebuj medeḡëḡin sir nivesa doḱ nah sën deneḡin sir wirek lo. In Anutu kwa vesa in nḡaa nebë sënë. ⁵In avëh alov sën yö perurek timu nedo lo, og rëḱ ayo na timu vu Anutu rot, lob rëḱ benḡev jaḱ meketag na vu Anutu in alam buk ḡerangah. ⁶Rëḱ mu avëh alov sën yö kwa nevo nḡaa sën neḡemu navi mu lo, og nahën nedo vesa rëḱ mu tu nḡaa diiḱsën. ⁷Om ḡenanër nḡaa sënë tato vu avëh ḡeving, in desepa doḱ medemedo niröp ḡeḡaḡek la su ḡëp vu sir. ⁸Rëḱ mu nabë mehöti su ḡëḡin yö yi alam nivesa rë, og mehö sënë su ayo neya timu vu Yesu rë. Yönon, nabë mehöti su ḡëḡin sir sën losho begganḡ ayo timu lo nivesa rë, og yi mehö nipaya veröḱ yi rot kesuu alam dahis.

⁹Lob nabë kwevu avëh alov arëḡ nabë Kerisi-yi-alam deḡëḡin sir, og kwevu sir nabë sënë arëḡ: Avëh sën raḱ maluh timu rëḱ diiḱ ḡenedo alov, lob yi ta mehödahis löö ya ḡgovek lo. ¹⁰Gavëh sën alam denenër bengö bë nevong nḡaa pin nivesa lo, og kwevu avëh nabë sënë lo arëḡ. Gavëh sën neḡin nalu lo nivesa, ḡenevet alam vatëveḱ, ḡeneḱo Kerisi-yi-alam vahi raḱ geneloḱ vu alam sën denetöḱ vu magḡin lo, ḡenevong huk nivesa vesa aggagga lo. Kë, avëh nabë sënë og mëm kwevu arëḡ. ¹¹ḡaḱ su kwevu avëh sën nahën navij mewis ḡeregḡaj nediḱ lo arëḡ, in rëḱ ayoḡ ḡurek in maluh, bahëḡ ḡeving nabë deḡaḱ maluh ngwë gökin, lob su kwaj bo Kerisi timu rë. ¹²Lob alam rëḱ denanër sir nabë nij paya, in deḡeyëh ḡaḡek sën denër bë deḡevong huk vu Kerisi timu lo. ¹³Rëḱ su rëḱ deḡevong nabë sënë mu rë. ḡaḱ rëḱ nij tebö jaḱ pevis medeḡëp sehëb, gedeḡetup doḱ alam hir begganḡ medenengö mehö ngwë hir ḡaḡek medeḡaḱ nij in mena detanë medenanër ḡaḡek aggagga sën hil su ayoh vu bë nanër rë lo. ¹⁴Nebë sënë om sa bë avëh alov sën nahën navij mewis lo, og deḡaḱ regḡaj nah in deḡeḱo naluj meyo deḡëḡin doḱ hir begganḡ. Yiḱ deḡevong nabë sënë in Mehö sën nesis begö vu hil lo su natöḱ vu ḡaḡek nipaya ti menanër jaḱ hil. ¹⁵In ḡeraḱ ni bë avëh la devuu aggata nivesa ya ḡgovek ya nebë sënë gedenesepa loḱ Satan. ¹⁶Nabë Anutu yi hur avëh ti yi alam la regḡaj denadiḱ ḡedemedo alov, og avëh saga yö ḡëḡin sir. Yö ḡevong nabë sënë in su debo magḡin vu Kerisi-yi-alam vahi medeḡëḡin sir. Nabë

sënë in Kerisi-yi-alam mēm yik degegin avēh alov sēn hir alam main sir lo mu.

Gāgek Raḵ Alam Ggev

¹⁷Alam ggev sēn denevonḡ huk nivesa rot lo, og ham sēn Kerisi-yi-alam ham lo gweḡo arēj jaḡ geham doḡ vu sir nivesa rot. Sēnēḡ sa nanēr alam ggev sēn denevonḡ huk niwēēk medenenēr Anutu yi gāgek ranḡah medenetateḡin nivesa vu alam lo. ¹⁸Nabē saga in gāgek neggēp loḡ Anutu-yi-ḡapiya nebē, “Su ḡetaya burmakau sēn denevonḡ huk bedenevakē wit* lo avij,” gaḡ ḡēp in yik dega teka! In gāgek ngwē neggēp ving bē, “Mehō sēn nevonḡ huk lo, og yoh vu bē ḡeḡo nyēvewen jaḡ.”

¹⁹Log nabē mehō ti nanēr ggev ti nabē nevonḡ paya, og su gwebē nengam vu aye, gaḡ mēm nabē mehō luu ma mehō lōō denanēr og mēm. ²⁰Gaḡ mēm nabē ggev ti gevonḡ nḡaa nipaya ti, og ḡebarah yi verōḡ jaḡ alam ggev pin malaj, in sir vahi degelē lob degōneng in sir. ²¹Sa nanēr vu hong niwēēk jaḡ Anutu geKerisi Yesu losho angēr sēn Anutu ggoo in sir raḡ lo malaj nabē: ḡesepa doḡ gāgek sēn sa ḡevu agi nirōp, besu kwam bo mehōti doḡ ayom namuḡin nabē vonḡ paya, ma su vonḡ paya rē, gaḡ gwengō gāgek nivesa meḡeseggi loḡ mēm. Log su ḡenanēr gāgek ahē seḡē vu alam vahi geḡenanēr gāgek ahē yes vu hong alam.

²²Log su gweḡo mehō ti megwevonḡ natu ggev pevis rē, in yi nḡaa nipaya rēḡ nom peḡa jaḡ hong geving, om nḡo gweḡin hong nivesa in gemedo nivesa gēḡaa nipaya su ḡēp vu hong.

²³Log su ḡenanum bēl kul meris mu rē, gaḡ ḡenanum wain teka geving, in gevonḡ bahēm medo nivesa, geniraksēn sēn netōḡ vu hong buk nḡahi lo nivesa jaḡ teka.

²⁴Log alam vahi, og hir nḡaa nipaya neggēp ranḡah behil pin arāḡ ni bē rēḡ denatōḡ vu nyēvewen doḡ nah, rēḡ mu alam vahi, og hir nḡaa nipaya yō neggēp vunsēn, benahub rē loḡ mēm netōḡ yam ranḡah.

²⁵Yik nḡaa nivesa vahi neggēp ranḡah nebē saga ving, gaḡ nabē neggēp vunsēn og yō rēḡ netōḡ yam ranḡah tamusēn in su yoh vu bē ḡēp vunsēn degwata rē.

Gāgek Raḵ Hur Sēn Detu Nḡaa Meris

6 ¹Alam pin sēn mehō la denebaḡo sir medenetu hir nḡaa meris lo, nabē Kerisi-yi-alam sir og degurek alaj lo babuj in gāgek nipaya su jikin Anutu arē los yi gāgek sēn hil nanēr lo.

²Log hur sēn alaj detu Kerisi-yi-alam lo, og su kwaj bo nabē arij om degevonḡ huk paya paya gesu degōneng in sir rē. Gaḡ ahēj geving alaj sēnē rot in Kerisi-yi-alam sir, gepasang degevonḡ huk nivesa rot vu sir. Om ḡetateḡin vu alam nabē degevonḡ nḡaa nabē sēnē, log ḡenanēr bedegevonḡ.

Hil Su Ahëd Geving Monë Pangsën

³Hil Mehöböp Yesu Kerisi yi gägek netatekin Anutu yi ngaa rangah menero vu hil niröp. Om nabë mehöti gebë gägek sënë geto getahu mehönon doḡ gägek agga ngwë, ⁴og hil ajaḡ ni nabë mehö sënë neḡo yi raḡ meris mu. Su kwa teka neggëp rë, gaḡ kwa nipaya neggëp vu yi. In ahë neving bë luho mehö ngwë degök sir in gägek la bedekesuu sir. Log ahë neving bë demehoo sir in gägek degwa. Ngaa nebë sënë og nevonḡ balam ayoj nesis yi, gedenevonḡ begö, gedenenër pelësën raḡ sir, gekwaj nevo ngaa nipaya raḡ alam vahi. ⁵Log denenër sir in gägek bahëj sengën yoh vu buk in kwaj nipaya, gaḡ gägek anon su neggëp vu sir rë, in denekuung bë hil nesepa loḡ Anutu in hil aḡorek kupeḡ lu ngaa.

⁶Yönon, nabë mehöti sepa doḡ Anutu niröp begelë ngaa sën neggëp vu yi lo nabë yik yoh vu yi, og nelë saga bë neḡo ngaa ngahiseḡë rot. ⁷In hil atad ḡo hil los nemad meris vu dob, log buk sën hil ḡevuu dob lo, og hil rëḡ anah nemad meris nabë saga. ⁸Om nabë hil nos los tob neggëp vu hil, og yik ggovek behil medo revuh los kwad vesa. ⁹Rëḡ alam sën kwaj nevo bë degeḡo kupeḡ ngahiseḡë rot lo, og seggisën rëḡ natök vu sir, lob rëḡ debës nabë sën mehönon denëḡo reggu luḡ söv. Ayoj nekehe sir in kupeḡ lu ngaa, lob denesepa loḡ ngaa kwamasën los ngaa nipaya agga ngahiseḡë, om rëḡ kebu jaḡ sir bedenadiik bemalaj nama. ¹⁰In ngaa nipaya aggagga degwa neggëp vu sën alam ahëj neving monë lo. Yönon, alam vahi ahëj neving monë pangsën rot, lob nedadii sir gedenevuu vonḡvingsën ya, log denevasap sir raḡ sënë medenetök vu maggin böpata rot.

Ḡenapiik Vu Sën Ḡemedo Malam-Tumsën Degwata Lo Niwëek

¹¹Rëḡ mu hong sën Anutu-yi-alam hong lo, og gweruu demim vu ngaa nabë sënë geḡebeya in. Gaḡ yik nim wëek meḡesepa doḡ ngaa niröp los Anutu yi aggata soḡek. Ayom na timu vu yi, log ahëm geving alam pangsën. Genajom hong ahon meḡebare niwëek gemalam yes. ¹²Ayom neya timu vu Kerisi, om ḡetahu doḡ alam sën deneserög in bë degeḡo kupeḡ-yaḡek-yi lo bepasanḡ ḡeserög niwëek in ḡemedo malam-tumsën degwata los degwata. In Anutu ggooin hong raḡ wirek loḡ buk sën ḡenër rangah raḡ alam ngahiseḡë malaj bë rëḡ ḡesepa doḡ gägek anon lo. ¹³Sa nanër vu hong jaḡ Anutu sën nevo saheng vu ngaa malaj-tumsën pin lo, luho Kerisi Yesu sën nër yi gägek anon rangah raḡ Pontius Pilatus mala gesu ggöneng in rë lo malaj nabë: ¹⁴Gweḡin gägek pin sënë nivesa. Su ḡenanër la paya, gesu gwevonḡ bemehö ngwë denanër gägek nipaya jaḡ. Gaḡ ngo gweḡin nivesa begëp niröp, rot behil Mehöböp Yesu Kerisi duḡ nom. ¹⁵Yönon, Anutu ggooin yi buk raḡ ggovek ya bë rëḡ tato Kerisi rangah, lob yik Anutu timu sënë sën semusën degwa geyi ala menëḡin

ngaa pin los dahis. Alam-los-bengöj pin hir mehö-los-bengö yi, gemehö böp pin hir Mehöböp. ¹⁶Yiḱ yi timu sënë sën su nediiḱ rë. Yö nedo loḱ ranḡah soḡek, om hil su ayoh vu bë ana dus jaḱ yi rë. Mehöti su lë yi rë, gemehöti su yoh vu bë rëḱ gelë yi rë. Arë böpata rot geniweëḱ rot berëḱ medo degwata los degwata nabë saga. Yönon.

Ḡaḡek Raḱ Alam Sën Deneggorek Nḡaa Nḡahiseḱë Lo

¹⁷Ḡenanër vu alam sën deneggorek nḡaa-dob-yi nḡahiseḱë lo nabë su degeḱo sir jaḱ vu alam vahi, gesu kwaj na vu hir nḡaa sënë nabë doḱ vu sir, in rëḱ mala nama na pevis. Gaḱ mëm ayoj na timu rot vu Anutu, in yi saga yö nevonḡ yi nḡaa nivesa vesa nḡahiseḱë vu hil in bë hil medo los kwad vesa. ¹⁸Ḡenanër vu alam sën deneggorek nḡaa aga nabë degevonḡ huk nivesa vesa nḡahiseḱë, log degevonḡ nḡatum bedebo hir nḡaa geleḱ alam bededoḱ vu sir medegero. ¹⁹Nabë degevonḡ nabë saga, og rëḱ dengupin nḡaa nḡahiseḱë in doḱ vu sir vu tamusën, lob deyoh vu bë rëḱ denatöḱ vu mala-tumsën soḡek.

Gweḡin Hong Huk Nivesa

²⁰O Timoti, gweḡin huk sën Anutu vo loḱ yöḱ nemam aga nivesa. Gweruu demim vu ḡaḡek meris meris pin sën anon ma lo, los ḡaḡek jeggin jeggin sën su neya niröp vu Anutu yi ḡaḡek rë lo. Log gweruu demim vu ḡaḡek sën denenër medenekuung raḱ bë kwa böpata neggëp loḱ, rëḱ ma genesis begö vu Anutu yi ḡaḡek lo. ²¹Alam vahi ahëj neving ḡaḡek nebë saga bedeneḱo raḱ, lob deneyoh paya in ḡaḡek anon. Anutu yi semusemu medo geving ham.